

## **DBKL LARANG JUAL MINUMAN KERAS DI KEDAI RUNCIT**

# ***Pembekuan lesen baharu masih berkuat kuasa***

**Kuala Lumpur:** Dewan Bandaraya Kuala Lumpur (DBKL) tidak memansuhkan pembekuan pengeluaran lesen baharu bagi penjualan minuman keras di kedai runcit, serbaneka dan kedai ubat Cina.

DBKL pada kenyataan semalam berkata, Lembaga Pelesenan Eksais Wilayah Persekutuan Kuala Lumpur (WPKL) yang baharu dilantik sudah menjalankan fungsi sedia ada dan hanya mempertimbangkan permohonan pembaharuan lesen.

“Pernyataan bahawa Lembaga Pelesenan Eksais yang bersidang pada 23 November lalu sudah menarik balik larangan penjualan minuman keras di kedai runcit, serbaneka dan ubat Cina adalah tidak benar.

“Pertimbangan terhadap penjualan minuman keras di ketiga-tiga premis berkenaan masih tertakluk kepada garis panduan yang sudah ditetapkan.

“Lembaga yang bersidang pada 23 November itu, hanya meluluskan 1,519 permohonan pembaharuan lesen borong,

rumah awam dan runcit. Tiada lesen runcit baharu yang diluluskan,” katanya.

DBKL adalah urus setia kepada Lembaga Pelesenan Eksais WPKL dalam memproses permohonan Lesen Minuman Keras di Kuala Lumpur selaras dengan perwakilan kuasa di bawah Peraturan 18 Peraturan-Peraturan Eksais (Lembaga Pelesen) 1977.

Terdahulu, tular di media sosial menyatakan ahli jawatankuasa yang baharu dilantik Lembaga Pelesenan Eksais di bawah DBKL dilaporkan menarik balik larangan penjualan minuman keras di kedai runcit, serbaneka dan ubat Cina.

**“Lembaga yang bersidang pada 23 November itu, hanya meluluskan 1,519 permohonan pembaharuan lesen borong, rumah awam dan runcit”**